

受謙詩文存

仙谿王福善著

仙遊大光印書局承印

序

制藝取士濫觴於宋極盛於明至清代尤臻美備士以科甲進身者舍是無以爲登庸之階然揣摩聲調拘守格式能者病焉自來著作家往往刻爲專集而不列於詩文之內以其爲干祿之具雖精且難於考據訓詁詞章均無所取也仙遊王二修先生爲一邑學者泰斗其立身行己謹嚴峻潔毫無遺憾與其弟又修同登光緒己卯鄉薦赴會試告罷退而授徒邑中從之遊者數百人先生接物和藹有以疑問扣者莫不神會心解門弟子取青紫者踵相接至科舉停罷而止生平詩古文不多作然於詩則涵泳性情文則紀事翔實雖不拘守八家門徑而動合矩矱昌黎所謂氣盛則言之高下皆宜也文孫俾爾君從余遊搜集先生遺著得詩七十三章文六十三篇付之鉛槧名曰受謙詩文存並取先生拔萃鄉試程文介弟又修己卯鄉試掄魁程文及嗣君季蒼王寅鄉薦程文附之以見清季科舉變制之遺蛻囑余爲敘余嘗讀文文山先生集亦附以制藝程文其座主王伯厚先

生評曰此卷古誼若龜鑑忠肝如鐵石敢爲國家得人賀然則士患無實學耳謂制藝取士不足得人非確論也仙谿素多積學之士清初有王霞養先生著霞養文集四卷詩集二卷收入四庫全書中葉又有王懷珮先生爲左海高弟著閩中沿革表四卷儀禮廣義六卷三近堂制藝三卷東越獻徵錄金石書院志笑瑩錄四書筆記仙谿文存各若干卷清季又得先生名與之伯仲謂仙谿文獻盡在王氏一家可也余少時應學使歲試所作制藝先生見之甚爲贊許而惜余福命不逮蓋知清運之將終也今敍先生遺文特附識之以見論世知人之鑑云

中華民國三十七年戊子季春年世愚姪莆田張琴治如甫識

受謙詩存

仙谿王福善二修著

孫慶昌俾爾校

對菊詠懷

菊顛歸去不重來

孟絳序帥號菊顛道人

門徑長間半是苔爲問秋花能耐晚短離何日一枝開

題夕佳窗

盡日寒風獵獵吹夕佳窗裏垢塵滋柴門自掩頻搔首寄寓經年未得詩

晚夏苦晴

午雲消盡晚霞明連日風吹雨不成人語四更斜月裏田間纔斷桔槔聲

喜雨

久晴苦不雨久雨苦不晴小民多怨咨天地難爲情年來水旱災比戶飢農氓糠粃春作糜計口一杯羹父老勤望歲三春正課耕不雨將一月祈卜心忤忤皇天憫黎元大雨挾雷行須臾畎澮足田水夜有聲分秧徧南陌平隴綠縱橫所願自

今始時若百穀成田禾皆早熟卜我倉箱盈又聞昨縣官平糶且緩征嗟哉我父老何日見昇平

自嘲

賃舍兩三間離家四五里朝夕往復來問君何爲爾

春夜思歸示友人

離家纔四日無夜不思親天暗濃雲合更闌宿雨春羈栖愁作客旅食爲居貧莫怪歸期數門閭望已頻

夜雨悲懷

地下相從不可知誰憐自苦又生離今年春雨重惆悵忽憶思歸夜半時

將移硯於東山別墅留題夕佳窗言別二首

二百年來少讀書遊庠喜見定夫初

自世祖淳庵公居后莊來少入泮者今年定夫始補弟子員

憑君寄語諸年少共致

青雲志不虛

四年風景已全非南望山前淚欲揮

母墓在后莊門前與夕佳軒對面

遊子何之秋日暮悲風蕭瑟白

雲飛

題東山別墅

負郭無田硯作田僧房借得小如船此生慣走風塵裏小住寒齋又一年

酬鄭君祖望言別用其韻

乍離還合合還離七載匆匆日月馳世事乖違難及料平生契闊最相知學能疑處無非悟詞苦煩時要不支別後光陰加愛惜將來莫負此心期
來詩相示話分離兼訴飢驅道路馳共此生涯君且守不言辛苦我應知詩書有暇惟須讀薪米無供好自支最是一廬風雨夜夢中還與故人期

別蘇君康禮四首

中宵有夢亦思親至行無虧性淑均對坐忘言令我敬久交莫逆見君眞堅持戒律能成佛廣積陰功信感神

蘇君性至謹頗信因果

吾黨從遊二三子如今謹厚更何人

硯席權陪只再期平生相識恨何遲每因竹悶憐多病更奈花愁唱可離北嶺停雲春晚日東山玩月夜闌時不常相見常相憶看取今番送別詩

二老堂前半白頭有親六十復何求同胞共篤連枝愛中饋先爲囑菽謀已覺帶
帷多快樂更從晨夕解離憂年來望汝常努力合着儒冠魯泮遊
爲文只要困求通愧我曾無小補功飯釘腐談知太濫筍蔬酸氣更宜空精神團
聚思逾細口舌甘回味不窮直道會心非在遠更深試問一燈紅

關混五首

果報平生願奉持冥間陰事竟誰知每稱神怪驚流俗我欲重爲關混詩
生爲忠義沒爲神精氣常留此理真儘說修行尸解去終成方伎一流人
言慈言孝費婆心賣卜成都講易深我謂君平眞菩薩不將神道使人尋
由來孝弟有人知和氣相迎物感之到處項斯從爾說只言庸行不言奇
降妖驅鬼近靈巫此理難從問有無左道儘多能惑衆直須看破在吾儒

白巖山

鄭常侍良士讀書處

城南望諸山白巖在雲表勢聳峻嶒白石何皎皎我來渡迴谿巖徑入窅窳老
鶴昔歸林戢翼自清矯雪爪不可尋爾思幽以香絕頂且一登俯視仙城小

濯纓亭

老松蟠曲臥熊虎怪石周遭圍萬鼓崎嶇巖壑行徑微流水白雲自今古我不遠
訪亭濯纓破寺有僧出門迎具言亭構數百載後來修者不記名古有朱子書二
匾天光雲影照波明水波洄塘三十里茫茫亭外混太清壺公穀城山倒蘸眼前
恍惚見蓬瀛古人已往今人老平湖蕪沒生秋草青姑塘作林家池亭亦巋然歛
欲倒我聞此語重搔首世事滄桑更何有沈沈皓月照寒潭謾謾涼風生虛牖會
當靜坐洗塵心思與古人爲尙友君不見壁間題詠無時無至今傳誦獨林叟

軒先生有詠
濯纓亭詩

九鯉湖棹歌

打來雙槳飛短篷小舟泛月鯉湖中眠鷗驚起芙蓉紅金蛇攪波欲擎空水漲船
如坐碧穹轟煙瀑布聲轟洪珠簾玉筍垂玲瓏下上溯流樂未終艤舟忽夢入仙
宮平湖水與銀河通仙人一笑招我同赤足踏鯉乘天風

酬陳君濬文惠贈貂鼠皮袍領

昨朝歸觀歌式微不意故人款荆扉去來相左闕展侍已覺茅舍生光輝故人交
誼不落寞推解之風古可作自身溫暖知人寒念我奉親衣服恐下得數片貂鼠
皮裁爲袷領勝狐貉溝壑空委惠見贈此物雖小意不薄我家老人六十秋今年
始買一羊裘圖之累歲願方遂俯念重爲子職羞亦有袷領狗尾續親乃推與伯
父儔所服敝貂重補綻革毛凋落禿頭驚思從獵者分一腋可買直欲傾貲求詎
謂故人能相送毛氎深厚文炳彪急召衣工爲製就俾親安煖寒無憂可玉明珠
未足報俚歌鄙句安能酬行當趨拜侍門左與子永好無時休

何嶺吟贈何太姻翁佑長

何嶺聳翠鬱嵯峨連峯綿互如奔波磅礴蜿蜒靈氣聚鍾爲奇人耆耆多誰抱九
仙仙骨者聚族居背何嶺下何仙舉手呼曾孫宴飲幔亭權未能立台行廚酌天
漿麒麟擘脯鳳爲炙俾爾昌熾壽而康千春不老如我長識語經今八百載龍眉
皓齒誰敢當我今得之太姻翁太翁綽有古人風耕田鑿井歌日出沽酒烹羊娛
歲終有子讀書萬事足有孫點項在相屬身因無事日倍長不識春秋相催促君

不聞逍遙地上有行仙一日可當兩日連稀齡價值萬萬錢便是一百四十年何
仙爲我笑拍肩况復崐崙山下種桃高齊天其說得之東方滑稽篇

感懷

癸酉九月十七日作

我自榕城歸於今匝一月抵家六宿間征塵拂未歇命駕來靈山坐案形兀兀愧
無走筆才左衝而右突披霧斬葛藤吾力既云竭日與羣兒言才氣就泊沒長年
作書囚鹽車困輓輓所得不如亡怪事空嗟咄俗慮攪煩襟衰病侵瘦骨念我同
門友高舉九霄鶴而我故紙鑽研田刮毛髮歎息後何言歲月去飄忽安得長翮
生一振秋風發

冬至後五日霧中來靈山寺口占

嶺霧溟濛混太虛入山深處幾躊躇雲中惟放泉聲出樹下時聞雨點疏吠犬逢
迎來已熟梅花消息問何如此生不是塵寰客莫笑仙人有謫居

聳翠樓

寺門圍繞萬松低聳翠樓高望不迷閒引青山當檻過時聞異鳥隔林啼年來風

景多忙度塵外遊蹤亦偶棲且喜老僧齋酒熟一樽拚共醉如泥

(八)

奉送十一世先伯祖劍周公塑像上天馬寺前殿因宿禪房七絕五首

并序

先伯祖諱家錄號劍周明萬歷諸王也有仙風道骨嘗夢緇衣人授以丹訣
遂獨出遊天馬山踞龍首石家人徧尋訪物色問一樵者得之已危坐三日
矣勸之歸不從乃伐木鑿巖架屋挈其配郎中瑞星公女鄉孺人偕隱焉後
無疾而逝其孫良忠因削髮奉祠是爲天馬有寺之始寺舊塑公及妣二像
咸豐間有山寇二人入寺毀之不旋踵皆顛觸澗石死同治癸酉公之裔孫
兆揚及比邱定美等始更塑新像以十一月十九日寅時進殿率族人禮拜
其夕同余宿祠下者治一廣揚紅哥美京也美京請詠其事余不獲以拙辭
峭壁崢嶸劍插天千尋水落斷崖懸公騎龍首從空下笑傲蓬萊第一仙
巖烟嶺霧鬱重開莫笑滄桑有劫灰今日還丹好顏色被人爭呼少年來
夜涼疑雨寺無僧掩臥空房冷不勝悟得人間塵境隔此心一宿已如冰
缺月峯岬近四更拂簷斗落又參橫山靈雜沓神君會風水中聞玉佩聲

遠

徧尋古跡未全非且踏危橋絕磴歸回首幔亭仙語喚天梯直上白雲飛

甲戌正月廿三日起程北行友人陳君濬文勝士燕貽鄭君祖望本祖黃君贊襄許君章有堂叔治一治中堂兄良弼從弟名珮胞弟盡善餞於石馬旅店留詩爲別

曉拂征鞭石馬東溪雲黯歷雨溟濛此行爲養求微祿今日論交見古風詩思匆匆孤店外離情脈脈一杯中諸君辛苦來泥濘感佩恩私愧此衷

宿建陞館

飄然一宿在莆城又聽打窗浙瀝聲想得家中應不寐生憎夜雨爲離情

過仙嶺

雨歇登仙嶺家山望不眞海風吹欲倒潮水沸無垠寒入征袍薄昏投旅店親殷勤勞童僕爲買玉堂春

正月廿九日榕城人以米粟煮粥相餉名阿膠粥是吾鄉所無者時在南台陳家地主見惠爲作短句

客裏光陰易自驚每逢佳節倍關情主人相款款意幸未清明已見錫

(十)

泊張家營

離通州八十里

渡頭昏黑滿天風莽莽驚沙起蔽空最是他鄉寒食夜一燈相伴四人同

鄭誠齋黃昭庭同年

及惠邑武舉蕭伯謀

清明

清明作客在舟中雙鯉迢迢信早通本擬帝鄉今日到天公遲送一帆風

擬秋興八首

獵獵西風吹樹林薄帷侵曉氣蕭森巴江激浪秋常雨巫峽連雲晝亦陰去國幾回迸客淚思家千里寄愁心極天關塞重重黑又聽孤城動急砧

白帝城邊北斗斜西州吹夢到京華身輕蜀道飛危棧路入天津問去檣祕省蒼苔封落石寒樓明月咽悲笳忽驚門外啾啾鳥故傍牆陰隱隱花
幾家籬落帶斜暉門俯江干曲徑微人共棕枒相伴老坐看鷗鷺一雙飛孔明興漢忠勤著張翰思吳富貴違寄語諸君須努力狂夫哀痛損腰肥

破碎江山半局棋園陵汎掃喜還悲長安日月開新運天寶衣冠異昔時朔管遙
吹防塞早夕烽未滅撤兵遲滄桴世變知誰任見說當年若夢思

西來天馬度陰山南貢明珠嶺海間常使相公握金鑑腰無胡虜覩潼關層城燈
火開恩宴百戲魚龍動聖顏令節千秋長獻壽蓬萊仙吏引清班

千門宮殿曲江頭蒲柳風煙忽報秋雨苑霓旌初日下驪山羽蓋暮雲愁喧嘈絲
管催飛鷁浩蕩滄溟沒去鷗清渭東流猶在目劍南回首望秦州

長城萬里始皇功漢起園池上苑中遼海戈船橫下瀨羽林鏐吹沸秋風似聞浩
劫殘灰白又見甘泉夜燦紅一自投身窮谷外江湖無地着衰翁

中南終古自逶迤影落琉璃積翠陂三秀瑞蒸靈圃草萬年春入上林枝良遊畫
舫攜朋出勝景歌筵逐賞移闕下五雲曾捧日千霄彩筆露珠垂

題陳潛文畫屏六幅

柱下蟠泥久騎牛一日還東來函谷道紫氣滿秦關
周宴瑤池罷秋風漢殿深忽傳王母至春鳥報佳音

爭說蟠桃樹千年結實繁東廂誰氏子偷過已三番
急付方平敕麻姑進酒來玉芽抽鳥爪香脯擘鱗胎
誤入天台洞郎心轉憶家出山流水去無處覓桃花
仙翁攜眷屬偕隱意何如不忍人間別登山倒跨驢

贈九十叟桐巖叔祖二首

吾祖兄弟三年二百五十公今秀眉長有過無不及
吾父今年春壽亦躋八旬與公結世好同是香山人

重贈桐巖

世間百行孝爲先孝行由來可格天公自孝親今有子請看滴水落階前
老母皤皤眼失明登堂侍奉有餘情如今九十重回首猶記當年咳笑聲

編介壽錄成謹題拙句一百韻奉申酬謝寄呈同學諸友並示季弟名韶
天壽由平格親年可不知老人娛晚景賤子戀春曦喜入寅正報重將戊紀推七
旬爭慶賀一室盡酣嬉燕寢門扉啓雞鳴佩悅施叩穹先致謝祝歲願延釐席上

芳茵列堂前綺障垂花光攢玉蕊燭焰吐金枝坐定呼歡鬧班聯拜跪遲弟昆更
進豆妯娌遞傳卮歛衿羞嬌女綳襦笑乳兒酌行催引滿舞軟學憨凝長柄壺蒸
鴨團頭筍剛狸猪筋抽似玉魚膾砍成絲得醬惟調芥嘗羹亦絮葵紛綸難筋下
傾倒勸杯持色養平生媿顏酖半醉怡分甘俱逐逐爲樂倍熙熙待旦筵將散登
堂客是誰戚姻能弗棄友誼更相維卷罕深車轍門開接履褰揚袍光璀璨曳珮
響參差入幕聯翩進升階揖讓辭璧主隆異數錦組備多儀金字看浮匾仙官立
對墀長翎絲繡鶴短脰玉登龜斗酒十千送盤柑三百遺惠多難盡謝物費勿論
貲尤喜諸同學齊賡不一詩先成誇行善繼唱是榮基小調添郎譜長歌烈舅爲
董生詞雅令家叔語清奇鄭子存繩墨黃君脫豹羈陳林堪對壘謝郭亦分麾具
體排常律鉤心鬪巧思共將徵事實不惜贊文詞更有虬髯客嘗參玉版師憑伊
工筆札爲我寫眾情調笑情何極揄揚意在茲累篇方快讀感舊忽長嘯念昔趨
庭日纔當就傳時間從操几杖親見捧盤匱潔滄因調膳含殮好弄飴門無謠布
粟室有和壘荒遇亂家中落遭窮世變衰抱經兼束耒學稼自敷菑窮筇笠筠籃

蓬頭垢足隨年荒難及麥勢急正然莫兄弟頻推食妻孥且忍飢石頑堅礪齒藥
欠病侵脾豈不幸和苦終無白受緇嘗參籌畫計弗利羨餘資致餽猶辭貨爲公
豈及私分當謀已拙道在濟人宜豸府修新譜鰲峯葺舊祠毀譽安足計精力瘁
於斯嗣是莪蒿長仍慚菽水虧歡愉沾廩祿痛悼失家慈教讀何曾歇形神亦已
疲猶從書院課共把硯田籽囊囊贏殊少科場數屢奇風塵經鍊折道路困欬噦
婚嫁謀方畢園廬計莫治子孫需紙筆親戚潤膏脂月例分錢送家常數米炊當
仁無所讓見義復奚疑挫屈心逾壯貧窮志肯移半生堅自信卅載去如馳昨幸
還家侍初謀退老期奉祠安硯几傍舍下書帷出與賓朋話歸從婦子嘻養蘭都
滿室栽竹不編籬鳥展開籠翅魚揚得水驚劇談時撫掌小飲一樞髭脫粟粗能
具清糟美可醺差知巢燕樂又恐吠彪欺人事原難必天心或許窺艱辛皆備歷
壽考定維祺家世多黃耆吾親况白眉固應符善頌不愧播芳規好事嗟予季令
名並我貽釀資裁錦繡載筆勒尊彝太史詞章潔天朝雨露滋尙嫌乏華節未免
陋茅茨乃使神仙衆同爲爵帛司蓬山呼呂李瀛海召鍾離頗得兒童喜能無長